

Во Вторник Сырный Вечера.

От начала Вечерни начинаем поклоны.

На Господи воззвах стихиры яко обычно.

На стиховне самогласен, глас 1:

Радостно примем вернии * богодохновенное заветание поста, * якоже прежде Ниневитяне: * и паки, блудницы и мытари: * яже покаяния проповедь от Иоанна есть. * Воздержанием уготовимся к преселению в Сион, * Владычняго священнодействия. * Слезами предочистимся в нем * Божественнаго умовения. * Помолимся видети образныя * зде Пасхи совершение, * и истинныя явление. * Уготовимся на поклонение Креста, * и Воскресения Христа Бога, * вопиюще к Нему: * не посрами нас от чаяния нашего Человеколюбче.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу напему, дондеже ущедрит ны.

Радостно примем вернии * богодохновенное заветание поста, * якоже прежде Ниневитяне: * и паки, блудницы и мытари: * яже покаяния проповедь от Иоанна есть. * Воздержанием уготовимся к преселению в Сион, * Владычняго священнодействия. * Слезами предочистимся в нем * Божественнаго умовения. * Помолимся видети образныя * зде Пасхи совершение, * и истинныя явление. * Уготовимся на поклонение Креста, * и Воскресения Христа Бога, * вопиюще к Нему: * не посрами нас от чаяния нашего Человеколюбче.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: **О** добрыя купли вашае святии! * Яко крови дасте, * и небеса наследовасте: * и временно искусившеся, * вечно радуется. * Воистинну добрая ваша купля: * тленная бо оставльше, * нетленная восприясте, * и со ангелы ликующе поете непрестанно * Троицу Единосущную.

Слава, и ныне, Крестобогородичен:

Подобен: Прехвальнии мученицы:

Дева Нескверная, * иногда на Древе видевши, * Егоже роди из безсеменныя утробы, * не терпящи утробнаго уязвления, * власы терзающи глаголаше: * манием содержай тварь всю, * како яко осужденный на Крест вознесен еси, * всяко хотяй спасти человечество?

Ныне отпуцаеши: **По Трисвятом,**

Богородице дево радуйся: И творим поклон един.

Слава:

Крестителю Христов, * всех нас помяни, * да избавимся от беззаконий наших: * тебе бо дадеся благодать * молиться за ны.: **И творим поклон един.**

И ныне:

Молите за ны святии Апостоли, * святии вси, * да избавимся от бед и скорбей: * вас бо теплыя предстатели * ко Спасу стяжахом. **И творим поклон един.**

Таже: Под Твое благоутробие прибегаем Богородице, * моления наша не презри во обстоянии: * но от бед избави ны, * Едина Чистая, * Едина Благословенная. **Без поклона.**

Господи помилуй, 40 кротким и тихим гласом.

Слава, и ныне: Честнейшую херувим:

Именем господним благослови отче.

Священник: Сый благословен христос бог наш всегда, ныне и присно и во веки веков.

Мы же: Аминь.

И молитву: Небесный Царю, * веру утверди, * языки укроти, * мир умири, * святыи храм сей добре сохрани, * прежде отшедшии отцы и братию нашу * в селениих праведных учини, * и нас в покаянии и исповедании приими, * яко Благий и Человеколюбец.

**И творим три поклоны великия, и глаголем молитву
преподонаго ефрема сирина:**

Господи и владыко живота моего, дух праздности уныния, любоначалаия, и празднословия не даждь ми.

Дух же целомудрия, смиренномудрия, терпения, и любви, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малые Поклоны: 12.

Паки скончавше поклоны, глаголем молитву вышеписанную Господи и Владыко живота моего: и поклон един великий.

Трисвятое. По Отче наш: Господи помилуй, 12.

Слава, и ныне: Господи помилуй, [трижды].

Благослови: И отпуст.

Повечерие поем великое с поклоны. По Достойно есть, тропари дневныя и храму. И отпуст меньший. Такжеже и противу пятка творим.

В среду сырную Полунощница, с поклоны ея.

В СРЕДУ СЫРНУЮ НА УТРЕНИ:

По шестопсалми, Аллилуиа, на глас Октоиха,

Стих 1: От нощи утренюет дух мой к Тебе, Боже, зане свет повеления Твоя на земли. Аллилуиа [Трижды]

Стих 2: Правде научитесь живущии на земли. Аллилуиа [Трижды]

Стих 3: Зависть примет люди ненаказанныя. Аллилуиа [Трижды]

Стих 4: Приложи им зла, Господи, приложи зла славным земли. Аллилуиа [Трижды]

И Троичны гласа, и обычныя кафисмы две.

Яко в среду и в пяток седмицы сырныя недели поем Аллилуиа. Сотворяем и поклоны вечер и утро, якоже выше речеся. И пост совершаем по чину, аще и коеголибо прилучится святаго, и тропарь имеяй будет. Междочасия же не поем.

Аще же праздник Сретения Господня, или храм коего святаго, поем тропарь, и поклонов не творим, точию по три поклоны великих.

По 1-м стихословии седальны Осмогласника Крестны.

По 2-м же стихословии седален Троиди: Глас 2.

Подобен: Благоутробия сущи:

С миром прейти нам смиренным, * предочищение благоволи постов, * неизреченным человеколюбием Твоим Христе Боже: * низложи вражия коварствия, * и Крестом Твоим вся спаси, * едина сведый сердечная.

Слава, тойже.

И ныне, Крестобогородичен. Подобен:

Предстоящи Кресту Твоему, * безсеменно Рождая Тя, * и не терпящи зрети неправедно страждуща, * рыдаше с плачем, и вопияше Ти: * како страждещи естеством безстрастный, * сладчайший Сыне? * Пою Твою крайнюю благостыню.

Зде чтем слово о посте, Великаго Василиа, егоже начало: Утешайте утешайте: и псалом 50.

Канон во Октоихе Кресту со ирмосом на 6: и в Минеи святаго на 4: и в Троиди на 4. В коих же песнех приспееет трипеснец, и поем канон Троиди со ирмосом на 6: и трипеснец на 8. И последи ирмос трипеснца. В сих же песнех оставляется канон Октоиха, и Минеи: И поем Минеи в вышних песнех сице: 1 песнь канона Октоиха со ирмосом на 4: И в Минеи святаго 1-ю и 3-ю песнь, на 6: И в Троиди на 4. Подобне поем осмую с шестою и девятою с седмою песньми.

Канон Троиди. Песнь 1. Глас 4.

Творение господина Андреа Критскаго.

Ирмос: Воспою Тебе Господи Боже мой, * яко извел еси люди из работы Египетския: * покрыл же еси колесницы фараоновы и силу.

Постыся Господь человечески, ко изображению нашему, побеждает искусителя, показуя наше, и пределы подписуя нам.

Моисей божественый в Синаи, воздержанием Богу лицом к лицу глаголати сподобися: тому вернии поревнуим.

Очисти Господи, люди Твоя, и призрев яко Бог милостивым оком, посети всех множеством милости Твоея.

Богородичен: К Тебе вси притекаем Богородице, яко поборнице твердей, на молитву движуща Тя, избавити стадо Твое от всякаго обстояния.

Песнь 3, Глас 4:

Ирмос: В Господе Бозе моем * сердце мое утвердися: * тем немощствующии препоясашася силою.

Чудный Енох воздержанием преложиися от земли: тому образоревнующе преложимся от тли к животу.

Молитвами и пощеньми Избавителя умолим: срадуется бо Создатель покаянию созданий Своих.

Готовися о душе, и предочистися прежде страсти Христовы, да воскресением духовно спразднуеша Ему.

Богородичен: Яко рождающая Бога, о нас непрестанно молися: к Тебе бо Богородице, грешнии прибегаем.

Таже трипеснец Иосифа. Глас 2:

Ирмос: На камени мя веры ...,

Простерл еси длани на Кресте Твоем, умертвил еси умерщвлением Твоим клятву, оживил еси страстию Твоею человеки. Темже поем Твое Божественное распятие, Иисусе Человеколюбче Боже наш.

Снедию древа умертвившеся, древом ожихом Креста Твоего. Того убо приносим Тебе в молитву: благодать и милость нам низпосли, Благодетелю Владыко Многомилостиве.

Преддверия отверзошася, пощения, поприще приближается воздержания, горящим усердием востанем, приемлюще дар богоданный, утоляющий зной прегрешений.

Время блаженное поста, лучи испускающее покаяния возсия, приступим любочестно, отгоняюще тьму глубочайшую лени, вси веселящеся.

Пост освятим любомудренно, проповедаим воздержание страстей, возопиим во слезах Владыце: даждь нам Господи благодать, содействующую в Твоя хотения, Многомилостиве.

Приимше дарования поста прославим давшаго во спасение, и сие соделаим трудолюбно, да оставление согрешений наших от руки восприимем Сотворшаго.

Богородичен: Утоли смущение страстей моих, исцели язвы души моея, воздвигни мя от сна уныния ходатайством Твоим, и предстательством, Пресвятая Владычице Мати Дево.

Иный, Глас 2:

Ирмос: Неподростовавший мой ум, * плодоносен Боже покажи ми, * делателю добрых, * насадителю благих, * благоутробием Твоим.

Вознесшуся Ти Спасе, волею на Крест, вся тварь земная подвижется, и раздрася храмная завеса.

Уязвился еси на Кресте Иисусе мой мене ради, и прободен в ребра Блаже: отнюдуже верою покланяюся Божественней державе Твоей.

Слава, Троицен: Преклонь колена на землю, Отцу, покланяюся, Сына славлю, и Духа воспеваю, единовольное начало, и Триипостасное.

Богородичен: Непостижимо есть таинство Чистая, Твоего рождения: раждаеши бо Марие неискусомужно Бога, и пребываеши нетленна.

Слава Тебе Боже наш, слава Тебе.

Постное время, силою Твоею Христе, освятив, спаси вся ны сетей вражних, покланяющихся Тебе.

Ирмос: Неподродствовавший мой ум, * плодоносен Боже покажи ми, * делателю добрых, * насадителю благих, * благоутробием Твоим.

Седален Миней святому. Слава, и ныне, Крестобогородичен.

Песнь 4, Глас 4.

Ирмос: Услышах слух Твой, * и убояхся, разумех дела Твоя, * и ужасохся Господи.

Авраам добродетелию и страннолюбием Троицу прият, ангельски пришедшую.

Богатство некрадомое воздержания есть дар: и сим обогативыйся, обогатится Божеством.

Слава: Приидите, восплачим вкупе словом, верою вопиюще: Боже, очисти ны много согрешшия.

Богородичен: Мати Непорочная, благословенная, Чистая Дево, Сыну Твоему и Богу нашему, о мире молися.

Песнь 5, Глас 4.

Ирмос: Возсиявый свет, и просветивый утро, * и показавый день: * слава Тебе, * слава Тебе, Иисусе Сыне Божий.

Постився древле Моисей в горе Синайстей, Боговидец явися: и Илия на огненной колеснице возношашеся.

Пощением иногда мудрый Исаия, угля онаго клещею вкушает, егда ко устам его прикоснуся.

Слава: Постився прежде Даниил, и трие отроцы вкупе, челюсти львов сокрушивше, горящий пламень попраша.

Богородичен: Богородительнице Чистая, Бога во чреве Твоем носившая нетленно, сохрани стадо Твое, и соблюди невредимо.

Песнь 6, Глас 4.

Ирмос: Якоже пророка Иону от кита избавил еси Христе Боже: и мене из глубины прегрешений возведи, и спаси мя едине Человеколюбче.

Иону в ките честное Спасе пощение иногда: постимся убо от сердца, и убежим онаго в геенне тления.

Ниневитяне же паки гнев Божий претвориша теплым покаянием и любовию: тем ныне любезно вси поревнуим.

Слава: Настоящий пост созывает нас на покаяние: притецем убо с любовию, и уразумеим, что есть дар воздержания.

Богородичен: Несказанно рождающая Спаса миру Христа Бога нашего, Того молящи не престай, род весь спасти воспевающих Тя.

Кондак святого: аще святыи не имать кондака,
глаголем мученичен гласа, иже и седален.

Песнь 7, Глас 4.

Ирмос: Отец наших Боже, * не посрами нас, * но даруй нам со дерзновением вопити Тебе: * благословен еси Боже отец наших.

Будем и мы яко Даниил оный, львы иногда постом укротивый в рове рыкающия.

Юношам трем поревнуим со страхом, да убегнем огня геенскаго, якоже сии Вавилонския пещи.

Октоиха, Постимся и мы чистым сердцем, и очистим тело, и весь всяко дух Богу посвятим.

Октоиха, Дево Мати Чистая, из Тебе воплощеннаго превечнаго Слова молящи не престай, спаситися душам нашим.

Песнь 8, Глас 4.

Ирмос: Царя Христа, * Егоже исповедаша плененнии отроцы, * в пещи глаголюще велиим гласом, * вся дела пойте Господа.

Постився прежде Иосиф, смешения избеже беззаконныя жены, и царство улучи. Темже и мы угасим пощением разжженныя стрелы врага велиара.

Пощением Давид победу постави на иноплеменника, и царство обрете: темже и мы приимем воздержанием победу на враги, и во Господе венчани будем.

Сохраним и мы добродетели их, Иовлево мужество, Иаковле незлобие, веру Авраамову, целомудрие Иосифово, и Давидову доблесть.

Богородичен: Царя Христа, Егоже роди нам Дева Мария, и по Рождестве пребысть Дева Чистая, вся дела Господня Господа пойте, и превозносите Его во веки.

Таже тришеснец иный, Глас 2.

Ирмос: В пещь огненную ...,

Крестоявленно Моисей длани возводя на горе, враги побеждаше: Ты же Спасе, на Кресте руке простер, умертвил еси всепагубное ада мучительство.

Гвоздьми прибиен на Кресте, и в ребра прободен Христе Спасе мой, клятвы избавил еси земнородныя, и радости нескончаемыя общники показал еси: темже благословим человеколюбие Твое.

Воздержания время возсиявшее мысленно просвещает душевныя чувства, и страстей мглу отгонит: темже лобызаим сие от сердца, превозносяще во веки.

Страсти всегубительныя душевныя, сласти смертоносныя пост умерщвляет, и истинно в постояннии творит сердца устремления и движения: сей убо верою восприимем любезно.

Не поста начало настоящий святой день вернии ведуще, сей чистым помышлением почтим, но вход глаголюще, и пришествие к преддверию постному.

Предприемлет десно боголюбезную душу предпутиями добрейший пост, предочистительных почестей преподобный, степенями и лестницею, к сей приложься нынешний день.

Богородичен: Отверзи толкущим нам, и милость Твою призывающим, скорое человеків прибежище, и твердая во всех Дево помощнице, и сущим в нуждах известная заступнице.

Иный, Глас 2.

Ирмос: В купине Моисею Девы чудо, * на Синайстей горе, * прообразившаго иногда, * пойте, благословите, * и превозносите во вся веки.

Вознесыйся на Крест всех Владыко, Адама со Евою паки воззвал еси, и в рай Христе Спасе ввел еси, Тя воспевающия во вся веки.

Тебе вознесшуся Христе на Крест волею, лучи солнечныя страхом помрачишася, и зайде день: отонудуже Тя разбойник Бога исповеда во вся веки.

Благословим Отца, и Сына, и Святаго Духа, Господа.

Троицен: Равна Отцу Сына, и Святаго Духа веровахом быти Святую Троицу в Божестве едином: Ейже верою покланяемся, Ариево учение присно попирающе.

Богородичен: Како Тя воспою, якоже подобает, Богородице Дево, смрадными грехами аз ныне помраченный? Но убо Пресвятая, прости мое дерзновение убогаго моего пеня.

Слава Тебе Боже наш, слава Тебе.

Кресте, верных упование, царей оружие, священников славо, монашествующих крепосте, твоею силою вся тя славословящия спасай во веки.

Хвалим благословим, покланяемся Господеви:

Ирмос: В купине Моисею Девы чудо, * на Синайстей горе, * прообразившаго иногда, * пойте, благословите, * и превозносите во вся веки.

И стихословится Честнейшую:

Песнь 9, Глас 4.

Ирмос: Величаем вси человеколюбие Твое Христе Спасе наш, * славо раб Твоих * и венче верных, * возвеличивый память Рождшия Тя.

Моисей во Египте море раздели, и люди проведе, и сия препита в пустыни непроходней, постом творя чудеса.

Иисус Навин воздержанием люди освяти, и наследствова землю обетованную, Иордан прешед прежде.

Геден оный, токмо с тремя сты мужей хлептавшими, побеждает иноплеменники воздержанием и молитвою: тому ревнующе и мы уподобимся.

Богородичен: Радуйся Всечестная, Чистая, девства похвало, ангелов утверждение, человеков помощнице, мира радости, Марие, и Мати, и Рабо Бога нашего.

Таже тришеснец, Глас 2.

Ирмос: От Бога Слова ...,

На Кресте простер Божественныя длани, совокупил еси прежде расточенныя, Избавителю: и Отцу осужденое ходатайством яко дар принесл еси существо человеков: сего ради поем пречистое Твое распятие.

Святаго поста возсиявшая благодать, лучи испущает нам предочищающия, паки течение помышлений, и зеницы тьму отгоняющия, вернии: сего ради усердно сей восприимем.

Светоносное пощение, дарований Божественных чашу почерпшее нам, днесь всем предъявляет: хотящии сея причаститися на пользу души, всех Владыце, содействовати нам помолимся.

Гвоздьми Божественных Твоих рук пригвоздил еси Щедре наша грехи на Кресте: кошием же ребр Твоих растерзал еси лукавое писание согрешений, и падений лютых. Сего ради поем пречистое Твое распятие.

Добродетелей добрейшая отверзается стезя, поприще божественных пощений, сие всем благоукрашается: подвизатися законно хотящии, просите Христа, мирное от высоты время нам даровати.

Богородичен: Скорейшею молитвою, бодрым Твоим покровом, державною Твоею Владычице Чистая помощь, ныне соблюди верныя Твоя рабы от всякаго сопротивнаго прилога, и страстей и прегрешений, и напастей спаси.

Иный, Глас 2.

Ирмос: Преестественно плотию заченшую во чреве, * от Отца безлетно предвозсиявшее Слово, * в песнях немолчных * величаем вернии.

На древе Крестнем волею пригвождься, всех нас свободил еси клятвы законныя: тем Тя по долгу величаем Христе.

Вси покланяемся страстем Твоим Спасе, яже волею восприял еси, да свободиши род человеческий работы вражия.

Троицен: Присносущно Отец и нетленно Сына роди, и Дух есть единосущен Отцу же и Сынови, нераздельная Троица.

Богородичен: Дати прощения прегрешений Марие преблагословенная, от Тебе воплощагося моли Спаса, нам грешным.

Слава Тебе Боже наш, слава Тебе.

Лобызающия тя, силою твоею Кресте, постное время прейти в мире сподоби, и избави работы вражия.

Ирмос: Преестественно плотию заченшую во чреве, * от Отца безлетно предвозсиявшее Слово, * в песнях немолчных * величаем вернии.

Светилен во Октоихе гласа, трижды: Троицен.

На стиховне самогласен дне, глас 1:

От брашен постящихся душе моя, и страстей не очистившихся, всуе радуешися неядением: аще бо не вина ти будет ко исправлению, яко ложная возненавидена будещи от Бога, и злым демоном уподобишися, николиже ядущим. Да не убо согрешающе, пост непотребен сотвориши: но непоколебима к стремлению безместным пребывай, мнящи предстояти распятому Спасу, паче же сраспятися тебе ради распеншемуся, вопиюще к Нему: помяни мя Господи, егда приидеши во Царствии Твоем.

Глаголем сей дважды.

Таже мученичен: Вас прехвальнии мученицы, ни скорбь, ни теснота, ни глад, ни гонение, ни беда, ни ярость зверей, ни меч, ниже огонь претяй разлучити от Бога возмогоша: любовию же паче к Нему, яко в чуждых подвигшеся телесех, естество забысте, смерть презревше: темже и по достоянию болезней ваших мзду приясте, Небеснаго Царствия наследницы бысте. Молитесь о душах наших.

Слава, и ныне, Крестобогородичен.

Подобен: Небесных чинов:

Вознесена яко виде на Кресте Агнца, Непорочная Дева, плачущи вопиаше: сладчайшее Мое Чадо, что новое, и преславное видение? Како держай вся дланию, на Древе пригвоздился еси плотию?

Таже, Благо есть исповедатися Господеви, и пети имени Твоему, Вышнии, возвещати заутра милость Твою, и истину Твою на всяку ночь.

Трисвятое, и по Отче наш:

Тропарь:

В церкви стояще славы Твоея, на Небеси стояти мнимся, Богородице дверь Небесная, отверзи нам двери милости Твоея.

Господи помилуй, 40.

Слава, и ныне: Честнейшую херувим:

Именем Господним благослови отче.

Иерей: Сый благословен Христос Бог наш, всегда ныне и присно, и во веки веков, аминь.

И молитву: Небесный Царю, * веру утверди, * языки укроти, * мир умири, * святыи храм сей добре сохрани, * прежде отшедшия отцы и братию нашу * в селениих праведных учини, * и нас в покаянии и исповедании прими, * яко Благий и Человеколюбец.

И творим три поклоны великия, и глаголем молитву преподонаго ефрема сирина:

Господи и владыко живота моего, дух праздности уныния, любоначалия, и празднословия не даждь ми.

Дух же целомудрия, смиренномудрия, терпения, и любве, даруй ми рабу твоему.

Ей господи царю, даруй ми зрети моя прегрешения, и не осуждати брата моего, яко благословен еси во веки веков, аминь.

Малие Поклоны: 12.

Паки скончавше поклоны, глаголем молитву вышписанную Господи и
Владыко живота моего: и поклон един великий.

ПРИСОВОКУПАЕМ ЖЕ И 1-Й ЧАС.

Начинает игумен, или еклисиарх или предстоящий монах:

Приидите поклонимся, [трижды]. Поклоны 3, и час 1-й, Вонъже чтем и оглашения Студитова.

Псалом 5.

Псалом 89.

Псалом 100.

Слава, и ныне: Аллилуиа, трижды. Поклоны 3.

Господи, помилуй, трижды.

Глаголем сей тропарь, Скоро, без пения:

Тропарь : Заутра услыши глас мой, Царю мой и Боже мой.

Стих 1: Глаголы моя внуши, Господи, разумей звание мое.

Тропарь: Заутра услыши глас мой, Царю мой и Боже мой.

Стих 2: Яко к Тебе помолюся, Господи.

Тропарь: Заутра услыши глас мой, Царю мой и Боже мой.

Слава, и ныне, Богородичен:

Что Тя наречем, о Благодатная; Небо, яко возсияла еси Солнце правды: рай, яко прозябла еси Цвет нетления: Деву, яко пребыла еси Нетленна: Чистую Матерь, яко имела еси на святых своих объятиях Сына, всех Бога. Того моли спастися душам нашим.

Стопы моя направи по словеси Твоему, и да не обладает мною всякое беззаконие. Избави мя от клеветы человеческия, и сохранию заповеди Твоя. Лице Твое просвети на раба Твоего, и научи мя оправданием Твоим.

Да исполнятся уста моя хваления Твоего, Господи, яко да воспою славу Твою, весь день великолепие Твое.

Трисвятое, и по Отче наш:

Тропарь: Скоро предвари, прежде даже не поработимся врагом хулящим Тя, и претящим нам, Христе Боже наш, погуби Крестом Твоим борющия нас, да уразумеют, како может православных вера, молитвами Богородицы, Едине Человеколюбче.

Господи помилуй, 40.

И молитву: Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаемы, и наставляемы, достигнем в соединение веры, и в разум неприступныя Твоя славы, яко благословен еси во веки веков, аминь.

Господи помилуй: трижды.

Слава, и ныне: Честнейшую херувим:

Именем Господним: И обычные поклоны.

Трисвятое, и по Отче наш:

Господи помилуй, 12.

Христе, Свете Истинный, просвещай и освящай всякого человека, грядущаго в мир, да знаменается на нас свет лица Твоего, да в нем узрим Свет Неприступный: и исправи стопы наша к деланию заповедей Твоих, молитвами Пречистыя Твоя Матере, и всех Твоих святых, аминь.

Слава, и ныне: Господи, помилуй, трижды. Господи, благослови.

И отпуст.

И исхождение в притвор: И лития за упокой.

В туюжде среду сырную.

Поем часы, 3-й, и 6-й, с поклоны, и тропари постными: на часех в кампан не ударяют.

НА 3-М ЧАСЕ.

Иерей: **Молитвами святых отец наших:**

Аминь. Слава Тебе, Боже наш, слава Тебе. Царю Небесный, **Трисвятое.** Пресвятая Троице. Отче наш: Господи, помилуй, **12 раз. Слава, и ныне.** Приидите, поклонимся, **трижды. и псалмы:**

Псалом 16.

Псалом 24.

Псалом 50.

Слава, и ныне: Аллилуиа, трижды. Поклоны 3.

Господи, помилуй, трижды.

Глаголем сей тропарь, Скоро, без пения:

Господи, Иже Пресвятаго Твоего Духа в третий час Апостолом Твоим Низпославый: Того, Благий, не отыми от нас, но обнови нас, молящих Ти ся.

Стих 1: Сердце чисто созижди во мне, Боже, и дух прав обнови во утробе моей.

Господи, Иже Пресвятаго Твоего Духа в третий час Апостолом Твоим Низпославый: Того, Благий, не отыми от нас, но обнови нас, молящих Ти ся.

Стих 2: Не отвержи мене от лица Твоего, и Духа Твоего Святаго не отыми от мене.

Господи, Иже Пресвятаго Твоего Духа в третий час Апостолом Твоим Низпославый: Того, Благий, не отыми от нас, но обнови нас, молящих Ти ся.

Таже, Слава, и ныне, Богородичен:

Богородице, Ты еси Лоза Истинная, Возрастившая нам Плод Живота, Тебе молимся, молися Владычице, со святыми Апостолы, помиловати души наша.

Господь Бог благословен, благословен Господь день дне, поспешит нам Бог спасений наших, Бог наш, Бог спасати.

Трисвятое. По Отче наш:

Глаголем сия тропари, глас 8:

Благословен еси Христе Боже наш, Иже премудры ловцы Явлей, низпослав им Духа Святаго, и теми Уловлей вселенную, Человеколюбче, слава Тебе.

Слава: Скорое и известное даждь утешение рабом Твоим, Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниих, но присно нас предвари, приближися нам, приближися везде Сый, якоже со Апостолы Твоими всегда еси, сице и Тебе желающим соедини Себе, Щедре, да совокуплени Тебе поем и славословим Всесвятаго Духа Твоего.

И ныне: Надежда, и Предстательство, и Прибежище Христиан, Необоримая Стено, изнемогающим Пристанище Небурное, Ты еси Богородице Пречистая: но яко мир спасающая непрестанною Твоею молитвою, помяни нас, Дево Всепетая.

Господи помилуй, 40.

И молитву: **И**же на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Господи помилуй: **трижды.**

Слава, и ныне: Честнейшую херувим:

Именем Господним:

Иерей: Молитвами святых отец наших:

И молитву: **В**ладыко Боже Отче Вседержителю, Господи Сыне Единородный Иисусе Христе, и Святой Душе, Едино Божество, Едина Сила, помилуй мя грешнаго, и имиже веси судьбами, спаси мя, недостойнаго раба Твоего, яко благословен еси во веки веков, аминь.

НА 6-М ЧАСЕ.

Приидите, поклонимся, трижды. и псалмы:

Псалом 53.

Псалом 54:

Псалом 90.

Слава, и ныне: Аллилуиа, трижды. Поклоны 3.

Господи, помилуй, трижды.

Глаголем сей тропарь, Скоро, без пения:

Иже в шестый день же и час, на кресте Пригвождей в раи дерзновенный Адамов грех, и согрешений наших рукописание раздери, Христе Боже, и спаси нас.

Стих 1: Внуши Боже молитву мою, и не презри моления моего.

Иже в шестый день же и час, на кресте Пригвождей в раи дерзновенный Адамов грех, и согрешений наших рукописание раздери, Христе Боже, и спаси нас.

Стих 2: Аз к Богу возвах, и Господь услыша мя.

Иже в шестый день же и час, на кресте Пригвождей в раи дерзновенный Адамов грех, и согрешений наших рукописание раздери, Христе Боже, и спаси нас.

Слава, и ныне, Богородичен: Яко не имамы дерзновения за премногия грехи наша, Ты Иже от Тебе Рождагояся моли, Богородице Дево: много бо может моление Матернее ко благосердию Владыки: не презри грешных мольбы, Всечистая, яко Милостив есть и спасти Могий, Иже и страдати о нас изволивый.

Тропарь пророчества, глас 3:

Царю Святый всеильне, Егоже бояться и трепещут всяческая, спаси нас: можещи бо простити грехи, яко Благоутробен. **Слава, и ныне, тойже.**

Прокимен, глас 6:

Прокимен: Спаси Господи люди Твоя, * и благослови достояние Твое.

Стих: К Тебе Господи воззову:

Пророчества Иоилева чтение. [Глава 2, ст. 12 – 26.]

Тако глаголет Господь: обратитесь ко Мне всем сердцем вашим в посте и в плачи, и в рыдании, И расторгните сердца ваша, а не ризы ваша, и обратитесь ко Господу Богу вашему, яко милостив и щедр есть, долготерпелив и многомилостив, и раскаяваяся о злобах. Кто весть, обратится ли, и раскается, и оставит за собою благословение, и жертву, и возлияние Господу Богу вашему? Вострубите трубою в Сионе, освятите пост, проповедите цельбу. Соберите люди, освятите церковь, изберите старейшины, совоющите младенцы сущия сосцы: да изыдет жених от ложа своего и невеста от чертога своего. Между степенями жертвенника восплачутся жерцы служащие Господу, и рекут: пощади Господи люди Твоя, и не даждь достояния Твоего на укоризну, да не обладают ими языцы, да не рекут во языцех: где есть Бог их? И возревнова Господь о земли Своей, и

пощаде люди Своя. И отвеща Господь людем Своим, и рече: се Аз вам послю пшеницу, и вино, и масло деревяное, и насытитесь их, и не дам вас ксему на поругание во языцех. И сущаго от севера отжену от вас, и отрину его на землю безводную, и погублю лице его в мори первом, и задняя его в мори последнем: и взыдет гнилость его, и взыдет смрад его, яко возвеличи дела своя. Дерзай земле, радуйся и веселися, яко возвеличи Господь, еже сотворити. Дерзайте скоти польстии, яко прозябнуша поля пустыни, яко древо принесе плод свой, виноград и смокви даша силу свою: И чада Сионя радуйтеся, и веселитесь о Господе Боже вашем, яко даде вам пищу в правду, и одождит вам дождь ранний и поздний, якоже и прежде. И наполнятся гумна ваща пшеницы, и преизлиются точила вином и елеем. И воздам вам вместо лет, в няже поядоша пружи и мшица, и сиплеве, и гусеницы, сила Моя великая, юже послах на вы. И снесите ядуце и насытитесь, и похвалите имя Господа Бога вашего, яже сотвори с вами чудеса: и не посрамятся люди Мои во век.

Прокимен глас 7:

Прокимен: Господь крепость людем Своим даст, * Господь благословит люди Своя миром.

Стих: Принесите Господеву сынове Божии.

Скоро да предварят ны щедроты Твоя, Господи, яко обнищавом зело: помози нам, Боже Спасе наш, славы ради Имене Твоего, Господи, избави нас, и очисти грехи наша, Имене ради Твоего.

Трисвятое. По Отче наш:

Глаголем сия тропари, глас 2:

Спасение соделал еси посреде земли, Христе Боже, на Кресте Пречистей Руце Твои простерл еси, собирая вся языки, зовущия: Господи, слава Тебе.

Слава: Пречистому Образу Твоему покланяемся, Благий, просяще прощения прегрешений наших, Христе Боже: волею бо благоволил еси плотию взыти на Крест, да избавиши, яже создал еси, от работы вражия. Тем благодарственно вопием Ти: радости исполнил еси вся, Спасе наш, Пришедый спасти мир.

И ныне: Милосердия сущи Источник, милости сподоби нас, Богородице, призри на люди согрешившыя, яви яко присно силу Твою: на Тя бо уповающе, радуйся, вопием Ти, якоже иногда Гавриил, безплотных Архистратиг.

Господи помилуй, 40.

И молитву: Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Господи, помилуй, трижды.

Слава, и ныне:

Честнейшую Херувим:

Молитвами святых отец наших:

И молитву великаго Василиа:

Боже и Господи сил, и вся твари Содетелю, Иже за милосердие безприкладныя милости Твоя, Единороднаго Сына Твоего, Господа нашего Иисуса Христа, Низпославый на спасение рода нашего, и честным Его Крестом рукописание грех наших Растерзавый, и Победивый Тем начала и власти тьмы: Сам, Владыко Человеколюбче, прими и нас, грешных, благодарственныя сия и молебныя молитвы, и избави нас от всякаго всегубительнаго и мрачнаго прегрешения, и всех озлобити нас ищущих, видимых и невидимых враг, пригвозди страху Твоему плоти наша, и не уклони сердец наших в словеса или помышления лукавствия, но любовию Твоею уязви души наша: да к Тебе всегда взирающе, и еже от Тебе светом наставляеми, Тебе Неприступнаго и Присносущнаго зряще Света, непрестанное Тебе исповедание и благодарение возсылаем, Безначальному Отцу, со Единородным Твоим Сыном, и Всесвятым, и Благим, и Животворящим Твоим Духом, ныне и присно и во веки веков, аминь.

НА 9-М ЧАСЕ.

Приидите, поклонимся, трижды. и псалмы:

Псалом 83

Псалом 84

Псалом 85

И паки: Сотвори со мною знамение во благо, и да видят ненавидящии мя и постыдятся, яко Ты, Господи, помог ми и утешил мя еси.

Слава, и ныне: Аллилуиа, трижды. Господи, помилуй, трижды.

Глаголем сей тропарь, Скоро, без пения:

Иже в девятый час нас ради плотию смерть вкусивый, умертви плоти нашея мудрование, Христе Боже, и спаси нас.

Стих 1: Да приблизится молитва моя пред Тя, Господи, по словеси Твоему вразуми мя.

Иже в девятый час нас ради плотию смерть вкусивый, умертви плоти нашея мудрование, Христе Боже, и спаси нас.

Стих 2: Да внидет прошение мое пред Тя, Господи, по словеси Твоему избави мя.

Слава, и ныне, Богородичен:

Иже нас ради Рождейся от Девы, и распятие претерпев, Благий, Испровергий смертию смерть, и воскресение Явлей, яко Бог, не презри, яже создал еси рукою Твоею, яви человеколюбие Твое, Милостиве, прими Рождшую Тя Богородицу, молящуюся за ны, и спаси, Спасе наш, люди отчаянныя.

Не предаждь нас до конца, Имене Твоего ради, и не разори завета Твоего, и не отстави милости Твоя от нас, Авраама ради возлюбленного от Тебе, и за Исаака, раба Твоего, и Израиля святого Твоего.

Трисвятое. По Отче наш:

Тропари сия, глас 8:

Видя разбойник Начальника жизни на кресте висяща, глаголаше: аще не бы Бог был Воплощься, Иже с нами Распныйся, не бы солнце лучы своя потаило: ниже бы земля трепещущи тряслася, но вся терпий, помяни мя, Господи, во Царствии Твоем.

Слава: Посреде двою разбойнику, мерило праведное обретесе крест Твой: овому убо низводиму во ад тяготою хуления, другому же легчащуся от прегрешений к познанию Богословия. Христе Боже, слава Тебе.

И ныне: Агнца, и Пастыря, и Спаса мира, на кресте зрящи Рождающая Тя, глаголаше слезящи: мир убо радуется приемля избавление, утроба же моя горит, зрящи Твое распятие, еже за всех терпиши, Сыне и Боже мой.

Господи помилуй, 40.

И молитву: Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагодутробне, Иже праведныя любяй, и грешныя милуяй, Иже вся зовый ко

спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоея славы, яко благословен еси во веки веков, аминь.

Господи, помилуй, **трижды.**

Слава, и ныне:

Честнейшую Херувим:

Молитвами святых отец наших:

И молитву великаго Василиа:

Владыко Господи Иисусе Христе Боже наш, долготерпевый о наших согрешениях, и даже до нынешняго часа приведи нас, вонже на животворящем древе вися, благо разумному разбойнику иже в рай путесотворил еси вход, и смертию смерть разрушил еси, очисти нас грешных и недостойных раб Твоих. Согрешихом бо и беззаконновахом, и несмы достойни возвести очеса наша и воззрети на высоту Небесную, зане оставихом путь правды Твоея, и ходихом в волях сердец наших. Но молим Твою безмерную благодать, пощади нас, Господи, по множеству милости Твоея, и спаси нас Имене Твоего ради Святаго, яко исчезоша в суете дние наша, изми нас из руки сопротивнаго, и остави нам грехи наша, и умертви плотское наше мудрование, да ветхаго отложивше человека, в новаго облечемся: и Тебе поживем, нашему Владыце и Благодетелю, и тако Твоим последующе повелением, в вечный покой достигнем, идеже есть всех веселящихся жилище, Ты бо еси воистинну истинное веселие и радость любящих Тя, Христе Боже наш, и Тебе славу возсылаем, со Безначальным Твоим Отцем, и Пресвятым и Благим и Животворящим Твоим Духом, ныне и присно и во веки веков. **Аминь.**

Слава, и ныне. Господи, помилуй, трижды. Господи, благослови.

И отпуст.

Посем изобразительная, и блаженны: Во Царствии Твоем: Скоро, без пения. Слава, и ныне: Помяни нас Господи: и поклоны три. Лик небесный: И прочая. И по Отче наш: Кондаки храма, и святому. Слава, кондак: Со святыми упокой: И ныне, кондак: Предстательство христиан: Господи помилуй, 40. Слава, и ныне: Честнейшую херувим: Поклоны три великия, и прочих 12.

Посем другой лик начинает Вечерню: Приидите поклонимся: трижды, и псалом: Благослови душе моя Господа: И прочая.